

欽

定

全

唐

文

欽定全唐文卷八十四目錄

懿宗二

䟽理滯獄詔

求言詔

令常參官舉人自代詔

停壽安公主入朝詔

貶夏侯孜太子少保分司東都詔

罪已詔

賜張元稹詔

金史卷之五 卷之四
責授鄭畋梧州刺史詔

答宰臣曹確等請加尊號第四表詔

答亳州太清宮使李蔚表進老君靈應詔

以天臺山獲石函冊文付史館詔

遣盧簡方諭李國昌詔

答給事中李湯封還制書詔

遺詔

許令狐滈應制舉科勅

分嶺南爲東西道勅

降徐州爲團練使勅

太皇太后寢疾權不聽政勅

疾愈推恩勅

賜楊收自盡勅

賜嚴譔自盡勅

收崔雍勅

賜崔雍自盡勅

遣使宣慰徐宿二州勅

命備邊勅

增制舉及第勅

改徐州爲感化軍勅

恤刑勅

欽定全唐文卷八十四

懿宗二

䟽理滯獄詔

至道所先刑柄最切向聞鞫斷動隔炎涼不惟理且未伸
多致疾而成天冤羈旣聚和氣乃傷日月星辰繇此失度
水旱蟲賊所以爲災自此委刑法官條示天下州府長吏
旋即䟽理無致淹延

求言詔

濟濟多士邦國賴之以取寧蹇蹇匪躬王臣急之以行義

故內懸諫鼓外設匭函思廣謨猷用宏風教自此在朝行者勿韜利國之謀居草澤者但貢安人之策必當開納擇彼所長勿慮依違翻成自滯旌揚之道無所恡焉

令常參官舉人自代詔

建中元年已有明勅常參官上後舉一人自代編諸式令實廣聞見既開推讓之途將致雍熙之化聞其近者多廢舊規從今後百官凡有除移切遵典故無取掩賢之誚當明舉直之心我得其人國無不理

停壽安公主入朝詔

志興奏汝以景崇未降恩命欲來朝覲事具悉景崇素開孝弟頗有義方洽三軍愛戴之情荷千里折衝之寄績廼舊服綽有令猷朝廷獎能續有處分緣孝明太后園寢有日庶事且停候祔廟禮成當允誠請

貶夏侯孜太子少保分司東都詔

河中晉絳磁隰節度使開府儀同三司檢校司徒同中書門下平章事河中尹上柱國譙郡開國公食邑二千戶夏侯孜早以文詞遂登科第累更清貫亦有能名東陽推撫俗之能故絳著臨人之稱其後用司風憲寵領藩條皆以

公才不辜時選洎掌於經費備厯重難居然要會之權頗得均平之道錄其績效擢處鈞衡造膝之時亦聞其籌畫沃心之際備見其謀猷於是念彼邊隅控臨巴蜀藉其才術再靜蠻貊翻致帑廩空虛軍資窘竭冤流闔境寇逼連薨雖易帥已來頗移星琯而無備之後歲有干戈昨者徼障初安瘡痍復疊數尋事實果驗根由旣乖經濟之源益昧君臣之義出於物議非獨予懷是議難處近藩爰更散秩可太子少保分司東都

罪已詔

動天地者莫若精誠致和平者莫若修政朕顧惟庸昧託
於王公之上於茲十一年矣祇荷丕構寅畏小心慕唐堯
之欽若昊天遵周王之昭事上帝念茲夙夜靡替虔恭同
馭朽之憂勤思納隍之軫慮內戒奢靡外罷畋遊匪敢期
於雍熙所自得於清淨止望寰區無事稼穡有年然而燭
理不明涉道唯淺氣多堙鬱誠未感通旱暵是虞蟲螟爲
害蠻蜚未賓於遐裔寇盜復蠹於中原尚駕戎車益調兵
食俾黎元之重困每宵旰而忘安今盛夏驕陽時雨久曠
憂勤兆庶旦夕焦勞內修香火以虔祈外罄牲玉以精禱

仰俟元貺必致甘滋而油雲未興秋稼闕望因茲愆亢軫於誠懷矧復暴政煩刑強官酷吏侵漁蠹耗陷害孤瑩致有冤抑之人構成災沴之氣主守長吏無忘奉公伐叛興師蓋非獲已除姦討逆必使當辜苟或陷及平人自然風雨愆候凡行營將帥切在審詳昭示惻憫之心敬聽勤卹之旨應京城天下諸州府見禁囚徒除十惡忤逆官典犯賊故意殺人合造毒藥放火持仗開劫墳墓及關連徐州逆黨外並宜量罪輕重速令決遣無久繫留雷雨不周田疇方瘁誠宜愍物以示好生其京城未降雨間宜令坊市

權斷屠宰昨陝號中使迴方知蝗旱有損處諸道長吏分
憂共理宜各推公共思濟物內有饑歉切在慰安哀此蒸
人母俾艱食徐方寇孽未殄師旅有征凡合誅鋤審分淑
慝無令脅從橫死元惡偷生宜申告伐之文使知逆順之
理於戲每思禹湯之罪己其庶成康之措刑孰謂德信未
孚教化猶梗咨爾多士毗予一人旣引過在躬亦漸幾於
理布告中外稱朕意焉

賜張元稹詔

去歲災興分野毒起徐方蕞爾庸夫稱兵犯命招諭不復

猖狂罔悛脅從三州之人汙染萬姓之俗逆順之理邪正
坐分果有忠臣悉殲逆黨再清郡邑不舉干戈此皆衆人
協心闔州受福但以首尾周歲取制凶威里閭不安農桑
失業言念於此倍積憂懷已有詔指揮令授元稔銀青光
祿大夫檢校右散騎常侍兼右驍衛大將軍御史大夫賜
分帛五千匹金盞一枚蓋碗一具金腰帶一條軍將張臯
已下二十人等第優給今差高品李志承押領宣賜

責授鄭畋梧州刺史詔

畋頃以行蹟玷穢爲時棄捐朝籍周行無階踐歷竟因由

徑遂致叨居塵忝既多狡蠹尤甚且居承旨合體朕懷一
昨劉瞻出藩朕豈無意爾次當視草過爲美詞呈譎詭於
筆端寵愛憎於形內徒知報瞻歎唾之惠誰思蔑我拔擢
之恩載詳言僞而堅果明同惡相濟人之多僻一至於斯
宜行竄逐之科用屏回邪之黨可梧州刺史

答宰臣曹確等請加尊號第四表詔

夫功合天者稱皇德合地者稱帝皇帝二者朕已享之況
孤寡不穀之名靡遵於元祖明聖孝德之號久忝於沖人
業業兢兢惟懼不稱南蠻未讐師旅尤屯東寇雖平瘡痍

尚大方將罪已曷敢矜功卿等修德銳於臯陶恥君不如堯舜鋪陳故事增飾洪名謙恭愈堅表章疊至對揚之際忠懇彌彰私我以奉先勉我以從衆亦念乙酉之歲堅請不渝今復固違似矜小讓名實未副朕當不敢荒寧始終相成卿亦勤於獻替勉俞來請深用愧懷

答亳州太清宮使李蔚表進老君靈應詔

我國家系承混沌元教遵清淨苦縣舊里聖祖故鄉宮宇具嚴廟貌斯設昨者餘妖奔突縱火將欲焚燒陰霧覆閉於晴空狂寇顛迷於道路散逸原野遂至誅夷緬維元功申

茲靈貺內出青詞又委李蔚虔申告謝布示中外仍付史官

以天臺山獲石函冊文付史館詔

上天降祉厚地呈祥爰有白簡靈書出於混元寶殿告國祚延洪之兆示坤珍啟迪之符顧此殊休宜爲上瑞宣付史館頒示四方

遣盧簡方諭李國昌詔

李國昌久懷忠赤明著功勞朝廷亦三授土疆兩移旄節其爲寵遇實寡比倫昨者徵發兵師又令克讓將領惟嘉

節義同絕嫌疑近知大同軍不安殺害段文楚推國昌小男克用主領兵權事雖出於一時心豈忘於長久段文楚若實刻剝自結怨嫌但可申論必行朝典遽至傷殘性命刳剔肌膚慘毒憑陵殊可驚駭況忠烈之後節義之門致茲橫亡尤悚觀聽若克用暫勿主兵務束手待朝廷除人則事出權宜不足猜慮若便圖軍柄欲奄有大同則患繫久長故難依允料國昌輸忠效節必當已有指揮知卿兩任雲中恩及國昌父子敬憚懷感不同常人宜速與書題深陳禍福殷勤曉喻劈折指宜切令大節無虧勿使前功

併棄

答給事中李湯封還制書詔

朕少失所親若非楚國夫人鞠養則無朕此身雖迂朝典望卿放下仍令後不得援以爲例

遺詔

朕祇事九廟君臨四海夕惕如厲宵分靡寧必求政化之原思建大中之道至於懷柔夷貊偃戢干戈皆以德綏亦自馴致冀清淨之爲理庶洽平之可臻自秋以來忽爾嬰疹坐朝旣闕踰旬未瘳六疾斯侵萬幾多曠暨和無驗以

至彌留嗚呼數之有窮聖賢所同明於斯言是爲達節載
申顧命式叶典謨皇太子權勾當軍國事儼性稟寬和生
知忠孝德包睿哲聖表徇齊必能揚祖宗之重光荷邦家
之不構宜令所司具禮於柩前卽皇帝位以司空門下侍
郎平章事韋保衡攝冢宰軍國務殷豈可久曠況易月之
制行之自古皇帝宜三日而聽政二十七日而釋服諸道
節度觀察團練防禦等使及監軍諸州刺史受寄至重並
不得離任赴哀文武常參官朝晡之臨十五舉音宮中當
臨者非時無得擅哭天下人吏百姓告哀後出臨三日皆

釋服勿禁食肉飲酒婚姻祭祀釋服之後無禁舉樂薄葬之禮宜遵漢魏之文其山陵制度切在儉約並不得以金銀錦繡文飾喪具五坊鷹犬等除蒐狩外餘並解放其醫官段璣趙玘符虔休馬伋等並釋放咨爾將相卿士中外臣寮竭力盡忠匡予令嗣送往事居無違朕志布告遐邇咸使聞知

許令狐滈應制舉科勅

令狐滈多時舉人極有文學流輩所許合得科名比以父絢職在樞衡避嫌不赴今因出鎮卻就舉場況諧通規合

試至藝宜令主司準大中六年勅考試只在至公如涉徇情自有刑典從今已後但依常例放榜本司取士貴在得人去留之間惟理所在

分嶺南爲東西道勅

嶺南分爲五管誠已多年居常之時同資禦捍有事之際要別改張邕州西接南蠻深據黃洞控兩江之獷俗居數道之游民比以委人太輕軍威不振境連內地不並海南宜分嶺南爲東西道節度觀察處置等使以廣州爲嶺南東道邕州爲嶺南西道別擇良吏付以節旄其所管八州

俗無耕桑地極邊遠近罹盜擾尤甚凋殘將盛藩垣宜添
州縣宜割桂州管内龔州象州容州管内藤州巖州並隸
嶺南西道收管

降徐州爲團練使勅

徐州本貫支郡先隸東平建中初李洧以畏忌歸降遂創
徐海使額貞元初張建封以威名寵任特貼濠泗兩州當
時緣拒捍淄青犄角光蔡務張形勢廣樹藩垣自寇孽冰
消區域無事武寧一道翻長亂階曾靡悛心殆成逋藪須
爲置制以削驍鋒徐州宜改爲本州團練使除當州諸縣

鎮外別更留兵二千人隸屬兗海節度使收管濠州本屬淮南節度收管宿州地居埇口路阨彭門北接睢陽南臨淮甸當漕運之要蓋水陸之衝宜置全師以臨列郡仍置宿泗等州都團練觀察處置等使便以宿州爲理所王式且充武寧軍節度使兼徐泗濠宿等州制置使其兵馬除留在徐州外仍令王式與元質量其多少分配宿州團練使及泗州兵馬留後濠州渦口城使下如人數猶多即分隸屬淮南浙西天平兗海淄青等道逐便收管各給本分衣糧其家一任相隨官中接借發遣令其存濟其割配諸

道將士緣皆有家屬須令裝束每人各賜絹兩匹以戶部物充其徐州諸縣先有鎮堡處亦量利害輕重差配人數守捉武寧軍大將如素有軍功及官已至中丞大夫以上者各具名薦聞別加委用其餘割送兗宿兩道軍前收管如情願住徐州者亦聽穩便王式元質一切共爲置制待公事分配總畢必知寧帖無事即令王式與崇憲等自領兩道兵馬直到汴州分付仲齊及滑州都將各押領送歸本道王式元質放許滑將士歸後旣無公事便赴闕廷別加勞獎其衙內銀刀等將官健有逃匿未捉獲者若能束

身自首所在歸投者一切不問仍準前勅割配諸道與衣糧并家口任去勅到後一月內不出陳首者即不在此限餘準詔旨處分

太皇太后寢疾權不聽政勅

門下朕聞孝養之道發於因心誠敬之文著在前典平時以問安自慰寢疾則省侍宜專太皇太后玉衣兆祥瑤齋啟聖母儀天下德被寰中春秋旣高飲膳微減朕親自迎奉移居永安期速就平勿藥有喜而精誠未感良醫無徵情方切於焦憂政豈遑於聽斷須躬問視以冀平和恐中

外具寮未諒予意起今月三十日以後權不聽政故茲宣示宜體朕懷

疾愈推恩勅

朕比寒暑致疾綿滯經時今旬朔之間寢膳已復蒙天地保佑宗社寵靈旣疾痛之有瘳念疲羸之無告爲之父母得不憫傷慮赦令之或頻則姦人之得計倘恩惠之遠布冀窮氓之稍蘇應天下百姓僧尼道士女冠等有年七十以上疾病癥痼委頓牀榻者宜各賜絹兩匹在軍旅行陣經敵傷害手足眼目不能營生亦各賜絹兩匹應州縣病

坊貧兒多處賜米十石或數少處即七石五石三石其病坊據元勅各有本利錢委所在刺史錄事參軍縣令糾勘兼差有道行僧人專勾當三年一替如遇風雪之時病者不能求丐即取本坊利錢市米爲粥均給饑乏如疾病可救即與市藥理療其所用絹米等且以戶部屬省錢物充速具申奏候知定數即以藩鎮所進賀疾愈物支還所司此勅到仰所在州縣寫錄勅榜於州縣門并坊市村閭要路其州縣所給卹絹米恐下吏之所隱欺仍委刺史縣令設法頒布不得令不到本身所在給卹之後一一分析聞

奏俾令速濟疾病稱朕意焉

賜楊收自盡勅

驩州流人楊收謬承獎擢任以台衡志每構其貪叨迹頗章於黷貨欺天罔上罪不可赦俾其全生是爲妄貸宜令內養郭全穆所在賜自盡

賜嚴譔自盡勅

前鎮南軍節度使檢校工部尚書嚴譔器本瑣微志惟凶險廣用賄貨交結奸邪致楊收不顧刑章恣爲威福以桂林江西之重舉爾爲名納陳珍奇寶之私竊我良守所令

按復不欲追窮頃聞海隅多難調發爲備蠻寇未息餽餉
方繁或擅納衣糧或廣補戍卒剋剝求取知無不爲罔地
欺天何嘗自愧而又因權使罔奏闕庭欲以資財用爲排
卻楊收旣當極典闕嚴刑將令肅振朝綱貴免紊亂邦憲
中外臣庶當體予懷宜令所在賜自盡

收崔雍勅

臣子之節無如盡忠士人之風宜當遠恥崔雍任居牧守
賊犯州城禦捍曾不發言從容乃與命酒沉石瓊未脫衣
甲志在當鋒不能獎其赤誠翻令擒送賊所原其深意與

賊通和臣節全虧情狀可見將行朝典更要推窮其崔雍家口並在宣州宜令宣歙觀察使追崔雍收禁勘責速具事繇申奏

賜崔雍自盡勅

當崔雍守郡之日是龐勛肆逆之初屬狂寇奔衝望風和好置酒以邀賊將啟關而納凶徒城內不許持兵皆令解甲致使三軍百姓拔血相視連頭受誅初聞奏陳深駭觀聽錫望守城而死已有追榮杜悵孤壘獲全尋加殊獎旣褒忠節難赦罪人玉石固分懲勸斯在將垂誠於四海當

何愛於一夫其崔雍宜差內養孟公度專往宣州賜自盡

遣使宣慰徐宿二州勅

徐宿二州將士百姓等去歲徐州戍卒專擅迴戈殺戮都頭剽奪器仗當時遠近言論朝廷便欲誅鋤朕以好生爲心懷土可恕不令究詰但任歸還將及本州又自疑阻俄興悖亂遽恣猖狂囚辱廉使監軍戕害小使大將邀求符節專撓城池朕再三招懷丁寧慰諭啟自新之路垂宥過之言奸計逾堅慢辭彌犯塗炭百姓虐毒四封近年以來劇賊無比爰思止殺乃命興戎稽緩靈誅殆將周歲然而

凶黨之外平人甚多皆被脅從遭其驅使每聞勝捷倍所
歎傷今既底寧專令宣撫縷申明之深委使臣除弊利人
蠲稅節用軍士衣賜俾其計量種麥是時已令給卹仍遣
臨時裁度唯務便安皆負周才以展良術軍人百姓罹此
橫禍災數致然勉於營生安茲樂土其餘事件並在德音
指揮使臣專臨重此頒述今遣左散騎常侍劉異兵部郎
中薛崇宣慰想宜知悉

命備邊勅

荆南節度使杜棕據司天奏有小孛星氣經歷分野恐有

外夷兵水之患緣邊藩鎮最要隄防宜訓習師徒增築城堡凡關制置具事以聞

增制舉及第勅

去年屬以用軍之際權停貢舉一年今旣偃戈卻宜仍舊來年宜別許三十人及第進士十人明經二十人已後不得援例

改徐州爲感化軍勅

徐州地當沛野軍本驍雄實爲壯國之都固協建侯之制況山河素異土俗甚殷豈欲削卑挫其縣盛蓋緣比因稔

禍或至亂常罪由已招孽非天作桂林叛卒繼有逆謀塗
炭生靈首尾周歲殺傷黎庶污染忠良所不忍言尋加翦
滅是以卑其鎮額隸彼藩方近屬大兵已來饑年荐至且
聞軍人百姓深恥前非願行舊規卻希建節朕每深軫念
思致雍熙欲示渥恩特議改易旣崇軍額要備供須宜賜
宣徽庫內綾絹一十萬匹助其宴犒必獲周豐累歲用兵
甚費國力特與借助功在節量如初有脅從後成亡命或
未還鄉里或逃匿諸州加意招攜各歸本業若稱自樂所
止亦可徇其私情貴衆士獲安恐一物失所用期昭泰必

在均平典故具存廢興不昧仍更鎮額盛彼軍威冀覩封疆永保寧謐其徐州都團練使仍改爲感化軍節度徐宿濠泗等州觀察處置等使

恤刑勅

慎恤刑獄大易格言語曰如得其情即哀矜而勿喜而獄吏苛刻務在舞文守臣因循罕聞親事以此械繫之輩溢於狴牢追捕之徒繁於簡牘實傷和氣因致沴氛況時屬煊蒸化先茂育並赦罪戾式順生成應天下所禁繫罪人除十惡忤逆及故意殺人合造毒藥持仗行劫開發墳墓

外餘並宜䟽理釋放如或信任人吏多有生情繫留續察
訪得知本道觀察使判官州府本曹官必加懲譴以誠慢
易到後十日內速䟽理分析聞奏

欽定全唐文卷八十五目錄

懿宗三

孝明太皇太后山陵優勞德音

夏令推恩德音

安卹天下德音

冊魏王侑文

冊涼王健文

冊蜀王侭文

即位赦文

大赦文

迎佛骨赦文

欽定全唐文卷八十五

懿宗三

孝明太皇太后山陵優勞德音

門下園陵之重典禮是崇故憲章旣盡於舊儀嚴奉式遵
於古訓載深追感用切哀懷公卿大臣洎百執事竭忠體
國宣力叶心誠敬有加恭恪無懈永告勤瘁宜洽優恩山
陵使所攝大行事官與一子九品正員官山陵禮儀使與
一子出身內山陵副使昨者責辦事重與一子出身山陵
使加一階仍賜物四十匹副使二十匹判官各十匹山陵

監修橋道使賜物四十匹判官各十匹內山陵副使加一
階仍賜物四十匹判官各十匹山陵置頓橋道使與一子
出身副使加兩階判官巡官巡檢專知官各加兩階合選
人前資見任各減兩選鹵簿使賜爵一級儀仗使加一階
陵所造作押當官及中使等三品已上賜爵一級四品已
下各加一階其中正員六品已下合選人前資後任各減
兩選白身各賜勲兩轉諸司諸使應緣山陵修造及專知
造作諸色檢校執事當官白身及直司掌上巧兒工匠等
五品已上賜一階六品已下各賜勲兩轉合選人前資見

任各減一選白身各賜勲一轉其給直和雇者不在此限
吉凶儀仗諸色行從官等五品已上各加一階如已至三
品未合敘者賜勲兩轉四品已下各加一階諸司諸使押
當官置頓營幕往來檢校軍將中使等五品已上六品已
下並各加兩階白身各賜勲一轉合選人前資見任各減
一選兩儀衛官及中使大內皇城留守並押當官等五品
已上六品已下各加一階白身賜勲兩轉撰謚冊哀冊謚
議書冊及讀謚冊書寶讀寶官等三品已上賜爵一級四
品已下各加一階鑄造冊寶裝寶及檢校官五品已上各

加一階六品已下各賜勲兩轉合選人前資見任各減一
選題神主官加一階昇寶冊官及舉寶官五品已上各加
一階六品已下各賜勲兩轉其中合選人前資見任各減
一選押鹵簿儀仗挽郎各加一階合選人前資見任各減
一選山陵禮儀置頓使判官各加兩階合選人前資見任
各減兩選儀仗鹵簿使判官及諸副使判官并省諸使諸
司監當雜職掌官吏等各加一階白身各賜勲兩轉挽郎
放出身後七選許集挽士挽歌等各減一年勞合選人前
資見任各減一選無勞可減者各賜勲兩轉諸色行事官

及齋郎禮生并陰陽生三品已上各賜爵一級四品已下各加一階合選人前資見任各減一選白身各減二年勞考滿人放出身其數處職任取穩便從一頭處分應緣儀仗三衛曠騎及諸色夫匠代選并緣山陵應役人夫車牛等各委本府長官本軍大使本司量事優賞太常禮直官及中書門下儀制官主務皆重事無遺缺特加一階如先已加階者委中書優與進擬諸道應奉使赴山陵幕府軍將等各加一階諸色職長官吏中應合減選人如無選可減者令所司非時與處分如有諸司流外充者各與本色

中量減一年勞無可減者優與處分充奉陵寢勞役實繁
新澤所沾異渥斯及其奉先縣宜放今年夏稅青苗錢如
已有諸色折納者即放於秋稅斛斗據數矜免布告中外
稱朕意焉

夏令推恩德音

門下朕聞惟天爲大惟堯則之施及文王昭事上帝朕遐
思古訓順考前聞仰止於皇王之閒規範於堯文之際始
如徒涉而望超溟渤中若策蹇而求躡雲霄思逮於三希
之則至由是力於恭己銳以濟人九載於茲一致不怠然

而德未甚腆信未甚孚雖懷汔可之詩敢企康哉之詠尚
賴社稷降祐祖宗垂休兵革向寧朝野斯乂自頃誕施渥
澤冀獲霽流猶慮莫及昭蘇愈多乏困今則夏田豐稔倍
於常時不足之憂暫免興慮又以西成未保蟲蝗是虞永
惟惠恤之宜庶叶消穰之要苟能利於百姓賴於四方可
使稼穡有年邊疆無事則惟恐不及豈憚於必行是用更
理闕遺載新提舉一陽斯始爰開蕩滌之恩晏陰將成式
繼矜蠲之令副我誠切在爾司存應京畿及天下見禁囚
徒暑毒之時要令䟽理牢獄之內慮有滯冤宜令臺府及

諸軍司并所在州縣長吏據見禁囚徒限德音到後七日
內親詳罪名䟽理訖聞奏不得更延引時日除非巨蠹有
礙去年赦條外餘並節級遞減一等從輕處分左降官及
諸色流人近雖累有赦令皆已沾恩欲其悔過自新豈恡
頻施霈澤經去年赦條已得量移者更與量移合復資者
準前例處分其去年十一月十日後至今年五月以前續
有左降官及流人亦便與量移如合放還者所司速與處
分內人久在深宮常膺役使不惟勤勞可憫固亦親愛是
思宜令揀選官人五百人放出各歸其家屬俾無離怨用

叶推恩現在宮人尚令揀放諸節進奉宜有指揮應諸親
及公郡主等每年端午及延慶并妃嬪生日所進女口自
今已後宜並停進鷹鷄之設本資畋遊朕端居穆清不好
馳騁所宜解放以遂物情左右神策軍各放二十聯五坊
放三十九聯飛龍放一十一聯其左右神策軍每年進鷹
鷄於數內停減春秋二社兩進九月十五日各停進鷹二
聯共停一十四聯應租莊宅使司產業莊磴店鋪所欠租
斛斗草及舍課地頭等錢所由人戶貧窮無可徵納年歲
既遠虛繫簿書緣咸通七年赦條不該今宜從大中三年

已後至大中十三年已前並令放免京兆府奏雲陽等一十二縣百姓論去年宿種麥苗下子後旋被蝗蟲食損今年盡不滋生雖京畿之間去冬蠲放不少但以疲人懇訴須務哀矜已令府司差官巡檢如有損處即時特與減放令府司具合放數指實聞奏戍役辛勤道途綿歷將還鄉土在贍供須安南邕州已奏放回北軍其於頓遞經過本州縣界並須如法先自備辦排比切不得臨時差配百姓及借索擾人仍錄前後德音赦條於鄉村分明榜示不得違越仍委所在長吏嚴立條制專加覺察枷禁所施在防

奸蠹舉便欠負未涉重條如聞府縣禁人或緣私債及錮身監禁遂無計營生須有條流俾其存濟自今日已前應百姓舉欠人債如無物產抵當及身無職任請俸所在州縣及諸軍司須寬與期限切不得禁錮校料令其失業又輒不得許利上生利及迴利作本重重徵收如有違越勘實奏聞去年德音赦令條流事件極多貴其普及生靈惠沾寰宇尚聞所在未盡施行今重舉明俾無留滯宜令天下長吏差清強判官專勾當切更分明檢舉一一據事節施行訖奏聞如更因循必行朝典其所差判官仍速具名

銜分析聞奏好生之德宜及禽魚卵育之時須加條制舊
勅每年起三月一日至五月末不許採捕水蟲禽鳥雖有
勅禁尚恐因循宜令臺府并諸軍司每及時禁之月更嚴
提撕勿使違犯儉德之修聖賢所重近日俗多澆靡時尚
矜誇朕常慕素風斯遵儉制去年赦文之內已曾明有指
揮所宜克副朕心用誠奢僭東川每年進蜜浸荔枝道路
遙遠勞費至多自今已後宜令停進布告中外稱朕意焉
主者施行

安卹天下德音

自累年以來四方多故雖已寧謐尚切防虞居安不忘於
慮危有備可期於無患況海隅封略猶集戎兵天下租庸
半資軍食而又徐泗戰爭之地瘡痍僅平江淮災沴之鄉
流亡未占遂使物力凋耗人情艱危言念蒸黎良深憫惻
朕臨寶位十有四年憂勤無一日之安怵惕居兆人之上
紹先王之遺訓守列聖之丕圖所以未明求衣分夜方寢
靜思致理罔敢怠荒顧臣寮而委以腹心視寰宇而同於
掌握管弦娛樂不替於萬幾稼穡艱難每臨於千畝今又
物惟豐茂歲獲順成宜宏覆燾之恩用作生靈之福應諸

道州府軍人百姓委所在長吏各承詔令切務慰安瘡痍
僅平者尤在撫綏流亡未占者倚深招諭物力凋耗之處
速致安全人情艱危之時無更侵擾遠年逋欠且緩併徵
近日歸還勿更加稅勸農重穀以備饑荒訓卒練兵用防
寇盜但躬行儉約政不煩苛省宴樂則務贍軍需絕餉遺
則盡資公用漸使疲羸蘇息帑藏充盈減朕之憂勤寬朕
之怵惕雖臣子之分必竭其忠誠而君父之心寧忘其誠
勵我有爵賞以訓有勞我有憲令以懲不一凡在方鎮岳
牧邑宰僚佐各揚爾職克副予懷

冊魏王侑文

維咸通三年歲次月日皇帝若曰夫翦珪分器事炳周經
裂地䟽封道光漢冊莫不克隆盤石作固本枝並建親賢
以崇藩翰朝有定制朕安得私爰稽盛時俾榮錫社咨爾
長男侑通暉日月稟慶霄漢蔭若木之凝華派璿源之積
潤天姿岐嶷神授聰明早彰樂善之規夙有辨牘之智卓
爾器度藹然徽猷宜荷寵章以開土宇今遣使門下侍郎
兼吏部尚書平章事杜悰副使左散騎常侍趙格等持節
冊爾爲魏王於戲河外名都漳滏奧宅爾其竭奉上之孝

敬慎臨下之儀刑守道宜鑒於遠名尊賢無忘於置醴用
新魯衛之政以昭間平之德服我休命可不慎歟

冊涼王佺文

維某年月日皇帝若曰夫維城作扞實隆定鼎之業犬牙
列國以盛建瓴之功故廣樹戚藩畢王子弟歷朝茂典列
聖宏規舉而行之朕不敢廢咨爾第二男佺分暉紫極託
質丹宮器度沈詳姿容端粹藹有成人之量形乎佩韞之
年志翫楚詩情通沛易不勞師傅之訓動形忠孝之規爰
嘉令猷俾建侯社今遣使門下侍郎兼吏部尚書平章事

杜棕副使左散騎常侍趙格等持節冊爾爲涼王爾其奄
長洪河大啟西土紹於前列恢我舊疆敬慎於朱邱之間
謹睦於玳筵之上靖恭其位克廣其心無從匪彝服我休
命

冊蜀王佖文

維某年月日皇帝若曰夫堯序九族周列五等事高維翰
道在睦親況居帝子之尊宜荷封王之典用彰慶羨以固
洪基咨爾第三男佖符彩昭融姿容朗悟騰英日域儲秀
星樞已多秤象之能纔是勝衣之歲靜不好弄言必成文

曾無紈綺之心每服詩書之訓嘉其幼智錫以大封今遣使門下侍郎兼吏部尚書平章事杜棕副使左散騎常侍趙格等持節冊爾爲蜀王爾其宅於坤維建茲赤社疏以江漢鎮以岷嶓列爲侯王邇我宮禁以謹恭而接下秉忠孝以律身服是寵光終於戒慎

即位赦文

門下朕聞龍之騰天漢也則必乘風雲鼓雷電以震六合君之踐大寶也則必敷仁惠渙號令以煦萬方是以地不閒於幽遐事罔論於輕重洪聖興而皇渥溥德音振而庶

類蘇故愆咎咸除枯沈盡起斯皆前代令典國朝成規委
轡諒戒於惠奸凝命始懷於布澤肆予寡德嗣續丕圖夙
夜乾兢若俯泉谷永惟我高祖太宗之艱難締構又惟我
列聖之慈儉統承思所以克紹休明宏濟億兆刻眊俗之
弊清理化之源肇祥導和應天順物致懽心於率土知恭
己以臨人爰申在宥之恩用洽惟新之慶可大赦天下自
大中十三年十月九日昧爽已前大辟罪已下罪無輕重
已發覺未發覺已結正未結正繫囚見徒常赦所不免者
咸赦除之惟犯十惡叛逆及故殺人官典犯賊及持仗行

劫並不在此限其故殺人者已傷未死已死更生意欲殺傷偶得免者並同已殺人法處分又刑獄之內官吏用情推斷不平因成冤獄無問有贓無贓不在原免之限左降官量移近處已經量移者更與量移其合復資者五品已上中書門下即與處分六品已下仍依常例選集丁憂去任及在憂制受貶者服闋日亦與量移如有親故在上都任經所司陳狀便與處分不必更待本州府申請其別勅因責受降資正官及曾因忤累停免未經引用者並與進改流人配隸及別勅安置不問道路及已到未到者並與

量移近處先已再經量移者仍並放還流貶人中縱元勅云雖逢恩赦不在量移之限或長流及充百姓終身勿齒者並與中書門下量與收敘處分及量移近處如已亡歿家口欲還及須歸葬者聽隨所在便如緣葬事幼弱饑窮不能自濟者委所在長吏量給棺槨優恤發遣坐累歲深加刑已衆累經赦令久未該恩用宏開網之仁俾釋向隅之戚應元和末惡黨前後處斷人數已多自今已後宜一切不問先有勅令追捕未獲者亦更不復追尋應先關連上件配流人并家口等縱元勅云長流充百姓雖逢恩赦

不在量移及放還限者並與量移近處如到流所經六載
仍並放還如已亡歿家口欲還並準前流人等例處分天
德五城流人負罪素重元勅未經十載不得放還今屬鴻
恩須令沾及宜減三年如年已滿便放還如情願便住者
亦聽左降官及流人先有官者如已亡歿各還本官亡官
失爵痕累禁錮者並從洗滌惟自今年八月九日已後坐
事流貶並不該此新恩之限營奉園陵所資發未備慮其
科率困撓黎元應緣山陵制及喪儀禮物宜委中書門下
及諸官之長講求故實必誠必信務遵遺旨用副朕懷所

緣山陵用度近已出內庫及戶部錢物充給應緣人夫工價宜各速令所司以不折估匹段兼見錢分數支給不得令侵屈百姓山陵未畢情禮有異其降誕進奉宜且權停志方思於遂物心匪樂於從禽止備蒐畋所宜節減諸道進鷹鷄每年共許進二百聯仍選擇堪處進奉餘悉放免貢獻無藝物力難充華靡不除時風豈厚諸道節度觀察使除大例合貢獻外不得別有進奉雕文刻鏤及異色綾錦難得寶貨一皆禁絕京畿賦役頗繁河洛凋瘵亦甚欲其綜息當在蠲除京兆府今年秋青苗錢宜每貫量放五

百文所放錢如是府司占留色目即委戶部準舊例據數支填不得令有虛折其大中七年已前百姓積欠兩稅斛斗及青苗權酒並稅草職田麴麩棘等徵收不得空繫簿書亦並放免如在官典所由腹內不在此限河南府今年秋青苗錢宜每貫量放三百文如是府司占額錢數亦委戶部準例支填應人戶積欠府司及度支戶部鹽鐵諸司大中七年已前諸色錢物斛斗銀錫草等如身已逃亡及身在貧窮家業蕩盡頻經校料終無可徵納者宜並放免如在主掌人吏所由腹內者不在此限逋負年多徵攤力

竭咸令已責庶可惠貧度支戶部鹽鐵三司應收管在城及在府州並諸色場鹽大中七年已前欠負諸色錢物斛斗等除官典所由請領官錢和糴市及在場官招商所由腹内外其餘人戶所欠錢物如身家已亡歿或在貧窮家業蕩盡無可徵納並逃竄捕捉未獲囚繫妻男攤徵保人等如此之類虛挂簿書終無填納之日宜並放免如聞後赦令蠲免放欠負所司不及時處分元係簿書徒有蠲免之名卻爲分外攪擾今所放錢物宜各令本司差辦事官典據年額人戶姓名所欠錢物色目檢勘便下文帳不得

更起條樣勘逐所徵可放生事擾人仍令所在場鹽院及州縣於要路分明懸榜示人戶俾令知悉仍仰所司各限月日處分訖具所放錢物單數分析聞奏災沴流行黎甿困窘免其租稅漸冀輯寧諸道州府有遭水損甚處其今年合納苗稅錢等委長吏酌量蠲放如大中十二年已前欠負兩稅米在百姓腹內徵收不上者亦宜特放其實遭災沴處仍具分析聞奏抱器逢時諒思展用卑棲疏迹能不懷嗟如聞中外官僚或有滯屈雖限以員闕致此因循而念其考歷孰非勤舊宜令中書門下各量才分漸與遷

改廣我四聰在於多士才宏景化思拜昌言諸色人若上
封事極言時政得失有官司者官吏長收狀聞奏無祿位
者任自投匭進狀當必親覽須務體國公言不得用情誘
訕每想侯封歲闕思於荒稔莫非王土物合通其有無諸
道州府閉糴禁錢頗爲弊事前後赦勅累有條具尚恐因
循依前壅塞宜委出使郎官御史切加察訪如有違越即
具奏聞叛徒相扇旣已翦除屬類潛逃宜從寬宥湖南江
西嶺南宣歙等處去年所遭狂寇擾亂尚恐軍人百姓至
今未安如先有爲患者關連親族或逃竄尚未復歸今一

切不問仍各委本道長吏分明曉諭切加招誘安存勿令
疑懼如百姓曾經被賊俘劫錢物官與收獲得者仰分明
勘認本主給還勿使曖昧欺隱仍具分析聞奏如聞京城
內富饒之徒不守公法厚利放債損陷饑貧前後累有勅
文約勒非不丁寧無良者都不遵守致貧乏之人日受其
弊宜令京兆府準寶曆三年四月二十日及開成二年八
月二日勅文切加提舉曉諭嚴切約勒處分凶險之輩情
狀難容如聞將吏傭保奴僕之徒或因愆過發遣之後輒
生怨謗摺拾本使及郎主細微之事意在僥求苟無所得

便成恐脅或闇投無主文字或擅進文狀此若不絕交害
平人自今已後宜準律文及大中二年九月十日及大中
六年八月二日勅便於當處焚燒所由不得收領及與聞
奏其擅進文狀宜勘責重加科誡如所由固違勅文不焚
燒所投文書尚敢將出當與告訴者同罪其容修文狀挾
奸蠹者委臺府及諸軍諸使切加察訪如有此色便捉獲
送府縣推問須令痛懲天下州郡於所公用之餘收糴年
穀自備水旱以救疲人賑絕及時免待奏請探聞惠物頗
謂通規今年正月一日赦文但令不別置倉慮煩別差官

吏主當所以令寄常平義倉任自分別支用如聞所在州郡未能盡喻詔旨袞入常平義倉縱遇年豐不務糴斂謬爲廢閣切在舉明令所在州郡細詳今年正月一日赦條處分其刺史去任日仍委本道觀察使便以在任日所收貯斛斗多少支數以爲考課言念士子祿以代耕選人例迫饑寒遠赴調集頻年被駐情實可矜宜令吏部準今年正月一日赦文處分廣敬坤儀當舉推恩之典垂仁磐石在霑霑澤之榮太皇太后及元昭皇太后第二等以上親委中書門下量才敘用大長公主嗣王各與一子出身九

廟子孫陪位者普恩之外各加兩階無官者各賜勲兩轉
仍據始封主後與一人出身委宗正寺卿檢詳圖譜一房
最沈翳者充數具名奏聞宗子中有行義可稱才幹足用
者亦委搜採具名銜事狀送中書門下量才敘用內外文
武見任及致仕官三品已上賜爵一級四品已下加一階
仍賜勲兩轉應入三品欠一考未足者考足日聽敘致仕
官量與改轉依前致仕弼諧萬物鎮靖四方洎於文武具
寮咸宣忠力並稟義方之訓宜推錫賚之恩追飾寵光式
彰孝理中書門下及諸道節度使帶平章事祖父母亡歿

未經追贈者並與追贈已經追贈者更與改贈東都留守
諸州府長守在京及分司常參官神策衛金吾六軍統軍
將軍四衛十二衛將軍威遠營鎮國軍等使父母死亡未
經追贈者並與追贈品秩已崇請迴贈祖父母者亦聽父
在無官者量與致仕官父歿母存量與邑號已有邑號者
量與進改竭力扶危捨生取義不旌後嗣曷表遺忠故尚
父汾陽王贈太師晟贈太尉秀實子孫中各與一人正員
官張巡許遠南霽雲顏真卿杲卿子孫中各與一人出身
祇奉典冊誠禮無違宜被優恩以酬厥效即位日攝太尉

奏詞中書令讀冊侍中進寶承旨宣制奏外辦禮畢各與一子正員七品官奉寶書綬讀冊及書玉冊官各特加一階書寶押寶綬舉昇寶冊官溥恩之外各加兩階合選人減一選其餘應職掌人行事及寫制令太常條選儀注等官三品已上更賜爵一級四品加一階仍並賜勲兩轉中書門下儀制官內侍省內教各特加一階鑄造玉冊並填金字造寶裝寶冊人等各賜物五十段承顧命撰制冊文及寫制誥官並已有昇其餘自八月九日至十三日諸寫制誥官各加二階大明宮留守及緣國慶告郊廟太清宮

行事官三品已上賜爵一級四品已下加一階應緣崇冊
太皇太后及追諡元昭皇后冊禮職掌行事官及鑄造冊
寶填金字人等節級賜物周詩歌白馬之客魯國闡素王
之風尚德崇儒宜旌胄裔二王三恪文宣王子孫各與一
子出身藩邸臣僚誠勤久著各加優獎用示恩榮鄆王府
官今年八月九日已前在任者五品已上並與進改六品
已下所司非時與分流外番考已足未足並放入流內侍
省及鄆王府官三品已上賜爵一級四品已下加一階五
品已下賜勲兩轉八月九日至十三日北內當上及從駕

者四品已下溥恩之外賜爵一級五品已下更加一階白
身更賜勲兩轉神策六軍金吾威遠皇城將士三品已上
賜爵一級四品已下加一階仍並賜勲兩轉馳奉章奏分
居職役冊勲進級甄彼勤勞諸道進奏官及緣國慶奏表
到京者溥恩之外各加一階仍賜勲兩轉翰林待詔並諸
色直長及供奉人等三品已上賜爵一級四品已下加一
階無階者賜勲兩轉飛龍閑廐宮苑典引掌扇內園總監
裁接少府將作中尚書武德軍器內外弓箭庫等諸司諸
使下白身及無品直司定額長者雜匠巧兒黃衣長上監

門直長雜仗二衛七色引執駕細引執扇角手弩手曠騎
武士天文觀生厯生漏生典鼓工人樂人主膳主酪典食
手宰手掌閑幕士駕士御醫工獸醫門僕藥童御書手流
外行署等賜勲兩轉宿衛師旅有勞委質蕃方偏裨
著效咸加獎賚庶洽恩榮應赴御樓立仗神策六軍金吾
威遠及皇城等將士宜準舊制量賜錢帛其神策軍應在
畿內鎮將亦各賜物有差應諸道將校三品已上賜一級
四品已下加一階無階者賜勲兩轉遠人慕義上國貢獻
將表懷柔俾霑寵錫鴻臚禮賓院蕃客等各賜物有差禮

經重於問年宜加廩餼王化存於勸善用激里閭天下耆
老八十已上者各賜絹兩匹粟二石九十已上各賜絹三
匹粟米五石並以上供錢常平義倉粟充給仍令令長親
致縣庭宣詔頒賜不得委人吏致有欺隱其九十已上者
仍加板授孝子順孫義夫節婦旌表門閭終身勿事先有
旌表者準耆老例優賜除弊安人由於制命寢而不用致
理良難大中以來頻有赦令有司廢閣多不遵行宜委中
書門下檢尋提舉有便於人者次第施行或有事理未盡
不便於人者仍委中書門下及所在長吏條具聞奏其守

法詳斷刑獄今年正月一日赦書已有條具處分仍本司切加提舉遵守施行不得輒有隳紊峻極靈長效祥興利俾申祀典以達明誠五嶽四瀆名山大川各委本道長吏以禮致祭亡命山澤挾藏軍器百日不首復罪如初赦書有所不該載者所司明作條具聞奏敢以赦前事相告言者以其罪罪之赦書日行五百里布告遐邇咸使聞知主者施行

大赦文

我國家膺天明命光宅萬方二百有五十載矣梯航所及

昭顯於夏殷文軌攸同夔逾於漢晉朕承十六聖之業居
億兆人之上猥惟眇身欽荷丕構遠奉貞觀開元之至理
近宗憲祖宣考之宏規常慕雖休勿休豈敢自暇自逸然
而仁不遂於百姓德不參於二儀莫致感通更延災沴近
者兵革未弭蟲蝗相仍方懷徵發之勞復起饑饉之歎雖
頻加錫賚累有蠲除尚慮澤未遍通信未旁及是用連宵
假寐每食忘食思所以拯我黎元臻其壽考或多方以革
弊盡慮以鼎新庶或上下欲從人欲況善爲國者以好生
爲首行王道者惟憫物是先苟可勝殘去殺亦冀止戈爲

武於戲誠明之志既悉於斯渙汗之恩夫何所愛可大赦
天下自咸通七年十一月十日昧爽以前大辟罪已下已
發覺未發覺已結正未結正繫囚見徒罪無輕重咸赦除
之惟犯十惡叛逆以上故殺人官典犯賊不在此限持仗
打劫必欲害人苟遇支敵必行殺戮拒敵追捕肆意奸凶
并故殺人者雖已傷未死已死更生意欲殺傷偶得免者
並同殺人法處分其賣毒藥開劫墳墓及刑獄之內官吏
用情推斷不平因成冤濫無問有賊無賊不在原宥之限
朕君臨四海子育兆人常恐萬類之中一物失所況雲南

素推誠節久慕華風顧帥臣撫御乖失不諭朝旨遂令滋
擾邊隅初陷交邕旋侵越巂屢移星歲彌縱干戈靡思量
力之言曾無事大之禮軼我疆理勞我隄防爰用徵兵諒
非獲已鋒刃之下多有殺傷每念於懷良深慚悼寧屈已
以徇衆不窮兵以害人斷自予懷更宏招諭應安南邕州
西川等道諸軍兵士各守疆界不用進師仍委劉潼審詳
事機明加曉諭如能重修和好信使如初朕當虛懷一切
不問雲南先差專使昨已有詔旨處分其先配隸習讀質
子各本道供給續當指揮安南邕管西川三道軍士皆踰

山越海環甲荷戈志切勤王誠深報國固內侵之封域收
已失之城池盡欲捐軀咸思賈勇亘淪歷數終始一心言
念忠勤誠用嘉歎今南蠻已加招撫冀就弭寧日下但嚴
守封疆且備要害雖未用更圖攻討亦未可便絕訓齊其
將士等義感風雲志諧金石屯營旣久立效已多大功將
成懇節無奪候其歸款別有指揮仍委劉潼高駢李耽等
具此慰勞以副予懷其三道軍糧地界懸遠致其盡力當
令充腸如諸道戍兵未免饑餒因之殞命尤用傷懷宜令
常宙劉潼嚴加條流丁寧期限無使供饋更聞失時其府

赴三道行營兵有親老及妻子在家者各委本道切加存恤勿使凍餒恓惶俾無迴顧之憂以勵當鋒之志其諸將士勇敢用命當鋒歿身義節可嘉孤弱是念並委本道節度使據所申報各須安存如血屬單弱不能自存者即厚加給卹遺骸在野深可憫嗟今春已降德音盡令優給收葬尚慮暴露未契幽陰今更舉明用慰泉壤宜令所在長吏訪尋收斂如法瘞葬仍以酒醪殷勤奠醑應三道兵士經過累路州縣供應頓遞徵配里閭水程船夫陸路車役勞弊斯甚疲瘵可哀其岳州湖南桂廣邕容管內沿路州

縣今年二月一日德音已蠲放今年夏秋兩稅各一半尚
恐鄉村未普更要加恩宜於今年夏稅正錢每貫量放三
百文沿路州縣亦甚凋傷先未沾恩今須優假宜於來年
夏稅正錢量放一半仍各委本處長吏親自點檢明閱簿
書勿使恩不布於疲羸幸或生於桀黠副予深意必及遠
人誠信之道蠻貊可行苟或未孚其肯懷惠應安南邕州
容州黔南西川諸溪洞酋長首領務加優恤喻以恩信若
須節級賜官秩賞給者委當管速具分析聞奏京畿之內
蝗旱爲災稼穡不收凋殘可憫其京兆府今年青苗地頭

及秋稅錢悉從放免仍並出內庫錢二十四萬五千三百六十餘貫賜官府司充填諸色費用河南及同華陝虢等州遭蝗蟲食損田苗奏報最甚除合放免本色苗子外仍於本戶稅錢上每貫量放三百文如今年秋稅已納即放來年夏稅其諸道有蝗蟲甚處並具奏聞亦議蠲減其河南府水災之後仍歲飛蝗想彼蒸黎尤多凋瘵宜別賜鹽鐵河陰人運米三萬石委崔璫充諸色用其諸道州縣應有逋懸兩稅斛斗青苗地頭榷酒等錢旣存簿書不免徵剝咸通三年以前者並一時放免從四年至七年其中有

準勅蠲者亦不得因此重徵京畿之內供億事繁色役差科曾無虛日黎人困苦深可憫傷更有逋懸日久徵迫無由收斂徒繫簿書應京兆府諸縣從大中八年後至咸通六年應欠諸司稅草斛斗糖棘番匠知食使玉蘇及府司欠延資并度支戶部錢物及賑貸折糴粟并諸縣欠填省修堰埭等錢匹莊宅監察使拆寺並佛堂材木樹等價及欠左右神策軍捉賊賞錢及諸縣應欠咸通三年至六年合送府夏秋稅錢物斛斗並麴麩莊田地租及諸縣咸通三年至五年賑貸粟并長安縣大中八年先借太倉粟充

賑貸除已納外餘欠斛斗等並從放免兼簿書一時毀廢
從今年以後別立帳內庫一年支放費用雖廣有司積久
追呼固多虛繫簿書頗爲煩弊朕方宏儉約深軫凋殘特
示優矜用蠲逋責應度支積欠大盈庫年支匹段絲錢從
太和八年以後至咸通元年以前并宜放免及欠瓊林庫
年支金銀錫器錦綾器皿雜物等自開成五年以後至咸
通元年以前并宜放免左降官量移近處已經量移者更
與量移如復資者任取本官選數聽集丁憂放還者服闋
日各與量移並別勅因責降除正員官所司亦與處分其

左降官及流人先有官者如已亡歿各還本官失爵痕累
禁錮者並從洗滌左降官并流人元勅令終身勿齒及長
流遠惡并云縱逢恩赦不在量移者並與量移如已亡歿
者並許歸葬如緣葬事困窮不能自濟者委所在官吏量
給棺槨優恤發遣中外前資見任官中其有頃因瑕累未
階錄用者并左降官如事情可恕才行足稱者委中書門
下量加簡拔隨能錄用戎狄款塞邊陲無虞或使臣因備
制弛慢切在搜訪利病濟便兵農勿以久安遽忘遠慮所
宜常加備境每切訓戒將宏安撫之功須爲經久之計其

邊上方鎮本軍兵數節度使皆位崇元帥誓立殊功必能
閱軍實以靜邊撫單寒以和衆素有定額固非空文然亦
慮或因犯死亡停解不便招募闕額遂多並須檢勘分明
仍委御史三司監院並加察訪即時聞奏江淮諸州百姓
只合輸本分苗稅不合分外差科多爲所在長吏權立條
流臨時差配或強名和市都不給錢自今除納本分苗稅
外一切禁斷牧守之任慈惠爲先欲安遠人須求廉吏如
聞邕容桂廣等道管内刺史每州皆管三縣人戶不少其
間選用尤要得人訪聞本道觀察使所奏監州官多是本

土富豪百姓兼雜色人例皆署爲本道軍職或作試銜便奏司馬權知軍州事旣不諳熟文法又皆縱恣侵欺多取良家以爲奴婢遂使豪酋搆怨溪洞不安若不條流生人轉困其邕容桂廣等道管内自今以後刺史必須精選賢良久歷官途不越資序者始許奏請其軍職試銜並不在奏署限藩條之例刺舉是資郡政之方邑宰是選斯紀綱共設次第相臨苟皆推公必無敗政如聞近者廉車殊無刺舉牧守率務并容邑宰非才疲人罹弊必在懲革以惠惇嫠自今以後委觀察使專刺舉之職如郡守不理或臨

財不廉酬飲是營獄訟靡息以時奏劾按罪定刑如藩方
不謹察廉或致下人上訴推覆得實觀察使別候勅旨本
判官遠加譴罰其郡守亦仰察訪縣令如或有過不舉停
任後別有處分錄事參軍重加削罰如刺史縣令有異政
灼然可舉者仰具錄奏必議超昇人命至重在慎典刑國
章苟隳必多枉撓近日執法之吏罕得其人或制勅不行
曾無提舉或奸巧爲患莫能辨明遂使可死者生可生者
死而又縲紲繁壅斷決淹延乃致怨嗟或成災沴予懷惜
怛寢食靡寧宜委御史臺刑部大理寺慎擇官吏皆須素

能折獄俾務盡心則人必闕法當畫一其天下州縣官等
皆罕悉律令莫知重輕唯任胥徒因多枉濫委本道觀察
使覺察聞奏又刺史縣令多務遊宴不思官常決遣旣妨
囹圄自滿永言冤滯豈不由斯委觀察使表率條流以懲
深弊度支鹽鐵戶部三司欠負錢物頻有赦令據年額節
級矜蠲如聞所司尚有徵迫妄豎可徵可放多因奸吏恣
情遂使恩不及夫窮危事無補於經費其諸色人戶所由
等應欠三司錢物自大中十二年以前並宜放免縣道之
間郵亭具列行李供億格勅著明如聞節度觀察刺史等

所經過不遵品式公券之外私費至多或在道途有六百
七百人行李所在地主務求交歡別差吏人號爲置頓必
皆率配弊及疲人自今以後所在長吏切加遵守格文不
得違越敕令所在闕蘇疲瘵如聞遠處州縣告示不得分
明今要條流永爲定制敕書到後各委本道全寫錄於縣
門榜示但緣事理煩細紙數頗多減放矜蠲頭項埋沒鄉
村百姓無因得知宜令所在長吏細詳各據本處百姓合
得免科段一一豎項作小榜於要路曉諭令百姓知悉宗
室子孫不合凌替班列之內人數至稀宜令宗正寺搜擇

宗子有行義文學吏事堪有清實者具名聞奏委中書門下量才敘用如在郡縣年已蹉跎士行可獎困於寒餒宜委所在長吏隨分驅策優假如聞編戶之中素非宗室因緣識故寫錄諸書投入宗枝妄認房籍恃憑攪擾侵害鄉村近日此徒敗露非一雖已行法未絕根源從今已後委所在長吏切加收獲如涉疑妄即收錄聞奏當加痛懲用安里閭前代爲賓素闕德理合頒恩二王三恪及文宣公各賜物五十匹衡琬拱衛執玉會同俾申懷遠之恩用展酬勞之錫神策六軍威遠營金吾及皇城應緣御樓立仗

將士等各賜物有差鴻臚禮賓院應在城內蕃客等并節級賜物功播一時名流千古念其後代觀以將來故尚父子儀贈太師晟贈太尉秀實各與子孫中二人八品官顏杲卿張巡許遠南霽雲子孫中各與一子出身中書門下儀制官及內侍省內教并特加一階勲著變和道彰鎮撫牧守宣力卿士叶心永言盡瘁之誠宜給追榮之典中書門下及節度使帶平章者祖父母父母并與贈官封已經追贈者更與改贈京文武常參官東都留守度支鹽鐵等使諸道節度觀察都防禦經略等使及神策金吾六軍將

軍大將軍威遠營鎮國軍等使父母已歿未經追贈者與
贈已追贈者亦與改贈父歿母存未封邑號者闕父見存
未有官者量與致仕官其曾任常參官出爲刺史縣令分
司等官今已得替兼前資郎官以上官其父母並準有見
任常參官例與追贈冠冕相先懸車自遂紀綱之僕軒陛
攸陳宜升階級之榮式進勲封之寵内外文武及見任及
致仕官三品已上贈賜爵一級四品已下加一階神策六
軍金吾威遠營皇城等將士普恩之外各賜勲兩轉天下
百姓年九十已上各贈米五石絹兩匹綿一屯羊酒有差

仍令本縣令就家存問今州府方員多不給付所用無幾
係體則深宜令以上供餘錢物充給訖各具分析聞奏

迎佛骨赦文

朕以寡德纘承鴻業十有四年頃屬蠻寇猖狂王師未息
朕憂勤在位愛育生靈遂乃尊崇釋教志重元門迎請真
身爲萬姓祈福今觀覩之衆隘塞路岐載念狴牢寢興在
慮嗟我黎人陷於刑辟況漸當暑毒繫於縲紲或積幽冤
有傷和氣關連追擾有妨農務京畿及天下州府見禁囚
徒除十惡五逆故意殺人官典犯賊合造毒藥光火持仗

開發墳墓外餘罪輕重節級遞減一等其京城軍鎮限兩
日疏理訖聞奏天下州府勅到三日內疏理聞奏